



18. august 2009

UKA 2009/104

Inatsisartut suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Qimmit qimuttut qimmeqarneq qitsuuteqarnerlu pillugit Inatsisartut inatsisaannit nr. 18, 30. oktober 1998-imeersumit avissaartillugit immikkut inatsisiliuunneqarnissaat pillugu Naalakkersuisut suliaqaqqullugit peqquneqarnissaannik siunnersuut.**

(Inatsisartunut ilaasortaq Kristian Jeremiassen, Siumut)

**Tungavilersuut:**

Kalaallit qimmii qimuttut qimminut nunani allaneersunut qitsunnullu sutigut tamatigut assersuunneqarsinnaanngillat. Kalaallit qimmivut nunarsuup issittortaani uumasuusut sulitillugit qimuttut inuussutissarsiornermi, sunngiffimmi timersornermilu atorneqartut immikkuullarissumik inatsisitigut aaqqiivigineqartariaqarput.

Qangarsuarli kalaallit Nunatta avannaani sikusartumi qimuttunik qimmeqarneq inuuniarnermi pingaarutilerujussuujuaannarpoq, allaat kalaallit nunami maani issittaqisumi kinguaariit ingerlaannarnissaanut pingaaruteqaqaluni.

Ineriartorneq ingerlajuarpoq, ukiunilu makkunani kalaallit qimmiinik pigisaqartut peqatigalugit ukiunut nutaanut atukkatsinnut inatsimmik nutaamik pilersitsinissamut sulinissaq piffissanngorsimavoq pissutigalugu kalaallit qimmiat inuuniarnikkut pingaaruteqartuummat inatsisitigullu illersorneqarnissaa qitsunnut assersuunnagit pisariaqarluinnarmat.

Naggataatigut kaammattuutigissuara Kalaallit qimmia pillugu inatsisissap suliarineqarnerani Kalaallit akornitsinni inuit kalaallit qimmiannik ilisimaarinnilluartut suleqataateqqullugit, taamatullu Nunatsinni Qimussertartut kattuffiat suleqatigeqqullugu.